

Morning Regional Dogri News Bulletin, 13th April 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. प्रधानमंत्री नरेन्द्र मोदी होरें जकीन दोआया ऐ जे जम्मू कश्मीर च असेंबली चुनाएं दे परैंत तौले गै एहदा राज्य दा दर्जा ब्हाल होई जाग।
2. विदेशमंत्री डॉ. एस.जयशंकर होरें आक्खेआ ऐ जे बन्ने पार थमां होने आली कुसै बी आतंकी कारवाई दा तगड़ेयाई कन्नै परता दित्ता जाग।
3. उपराज्यपाल मनोज सिन्हा होरें प्रदेश च मास्टर प्लान दी असरदार अमलावरी लेई सकारात्मक तब्दीलियां आला रौंह अपनाने दी जरूरतै पर जोर पाया ऐ।
4. उत्तर भारत च अज्ज बैसाखी दा ध्यार मनाया जा'रदा ऐ। राष्ट्रपति, उपराष्ट्रपति ते प्रधानमंत्री होरें लोकें गी इस ध्याड़े दियां ममारखां दित्तियां न।
5. आईपीएल क्रिकेट च जंदी रातीं लखनऊ च होए दे मकाबले च दिल्ली कैपिटल्स नै लखनऊ सुपर जायंटस गी 6 विकटें कन्नै हराई दित्ता।

<><><><><><>

PM-Statehood

प्रधानमंत्री नरेन्द्र मोदी होरें आक्खेआ ऐ जे जम्मू कश्मीर च असेंबली दे चुनां करोआने दे बाद बड़ी तौले प्रदेश दा दर्जा परतियै ब्हाल करी दित्ता जाग। अगस्त 2019 दे बाद कल पैहली बारी प्रधानमंत्री होरें जम्मू कश्मीर दा राज्य दा दर्जा ब्हाल करने दी गल्ल आक्खी। उधमपुर संसदी सीट लेई बीजेपी दे मेदवार डॉ. जितेन्द्र सिंह हुंदे समर्थन च कल उधमपुर च इक चुनावी रैली गी संबोधत करदे होई मोदी होरें आक्खेआ जे हुन ओह संमा दूर नेई जिसलै प्रदेश च असेंबली दे चुनां करोआए जांगन ते फही जम्मू कश्मीर दा राज्य दा दर्जा बी ब्हाल करी दित्ता जाग। उनें आक्खेआ जे लोक अपने विधायकें ते मंत्रिण कन्नै अपने सुखने सांझे करी सकगन ते जम्मू कश्मीर विकास दी इक नमी बत्तै पर अगड़ा बधोग। ध्यानजोग ऐ जे सुप्रीम कोर्ट नै जम्मू कश्मीर दा राज्य दा दर्जा ब्हाल करने ते विधानसभा दे चुनां करोआने लेई सितम्बर 2024 दी समें-सीमा तैह कीती दी ऐ।



Jaishankar-Pune

विदेश मंत्री डॉ. एस. जयशंकर होरें आक्खेआ ऐ जे बन्ने पारा थमां आतंकवाद दी कुसै बी वारदात दा परता देने दे देश दे पक्के इरादे पर सरकार कायम ऐ। विदेशमंत्री होर कल संजा पूणे च समर्थ युवा फाउंडेशन ते युवा स्वाराज्य प्रतिष्ठान आस्सेआ कराए गेदे समारोह च बोला'रदे हे। पिछली कांग्रेस दी अगुवाई आली यूपीए सरकार आस्सेआ 26/11 आले मुंबई आतंकवादी हमले पर कीती गेदी प्रतिक्रिया दा चेता करांदे होई विदेशमंत्री होरें आक्खेआ जे देश पर आतंकवादी हमला करने आले कन्नै निबडने कोई कनून दा बिघ्न नेई पौना चाहिदा की जे आतंकवादी कुसै कनून दी पालमा दी पालमा नेई करदे ऐन। विदेशमंत्री होरें आक्खेआ जे भारत केई देशें दे रौं च उसलै बदलाव आया, जिसलै कोविड महामारी मगरा भारत नै इक सौ शा बद्ध देशें गी कोविड-19 वैक्सीन उपलब्ध कराई।



LG-Master Plan

उपराज्यपाल मनोज सिन्हा होरें केन्द्र शासत प्रदेश च मास्टर प्लान कन्नै सरबंधत मामलें दे नबेडे लेई परियोजनाएं दी अमलावरी ते संगठित योजनाएं च सकारात्मक तब्दीलिएं आला रौंह अपनाने दी जरूरतै पर जोर पाया ऐ। घरें-मकानें ते शैहरी विकास विभाग दी कल लाई गेदी इक जायजा बैठक दी प्रधानता करदे होई उपराज्यपाल होरें तवी रिवर फ्रंट परियोजना सनें स्मार्ट सिटी मिशन, स्वच्छ भारतमिशन-शैहरी, अमरूत, प्रधानमंत्री आवास योजना-शैहरी, ई-बसें दे संचालन ते संगठित कमान ते नियंत्रण केन्द्र तैहत जारी परियोजनाएं दा बी जायजा लैता। सिन्हा होरें मुंसिपल कारपोरेशनें ते विकास प्राधिकरणें गी अशक्त बनाने लेई आक्खेआ तां जे परियोजनाएं गी तेजिया कन्नै तोड़ चाढेआ जाई सकै। मुख् सचिव, प्रधान सचिव, खजाना मैहकमे दे कमीशनर सैक्रेटरी ते होर दुए बड्डे ऐहलकार बी इस बैठक च मजूद हे।



JK Congress

कांग्रेस पार्टी एआईसीसी जम्मू कश्मीर दे प्रभारी भारतसिंह सोलंकी होरें बीजेपी सरकार पर कथित बुरे शासन आस्तै जिम्मेदार ठैहराया ऐ ते आक्खेआ जे पिछले 10 ब'रें च आम लोकें दी मुश्कलां केई गुणा बधियां न। उनें बीजेपी पर देश गी गुमराह करने दा इल्जाम लाया ऐ जे सरकार अपने वादे पूरे करने च असफल रेई ऐ। जम्मू च कल इक प्रेस वार्ता गी संबोधत करदे होई सोलंकी होरें आक्खेआ जे बीजेपी सरकार बड्डे-बड्डे उद्योग घराने दे हितें च कम्म करने च अग्गे ऐ। उनें आक्खेआ जे कांग्रेस दी यूपीए सरकार दी नीतिएं नै गै मजबूत राष्ट्र गी नींह रक्खी ही।

<><><><><><>

BJP-Chug

भारती जनता पार्टी दे राश्ट्री महासचिव तरूण चुघ जेहडत्रे गे जम्मू कश्मीर दे प्रभारी बी ऐन, होरें नैशनल कांफ्रेंस दे प्रधान डॉ. फारुक अब्दुल्ला होरें गी मोदी सरकार खलाफ प्रोपोगंडा फैलाने आस्तै गलत आक्खेआ ऐ। चुघ होरें आक्खेआ जे धारा 370 हटाए जाने दे परेंत जम्मू कश्मीर दे लोकें च राहत दा एहसास दिक्खेआ गेआ ऐ। कश्मीर संभावनाएं ते मौकें दी नमीं थाहर बनी चुके दा ऐ। उत्तर कश्मीर थमां उमर अब्दुल्ला दे नामांकन पर बोलदे होई चुघ होरें आक्खेआ जे एह साबत करदा ऐ जे नैशनल कांफ्रेंस नै कश्मीर दी मुख् थाहर अपनी हार मन्नी लेई ऐ।

<><><><><><>

Ramban Polls

रामबन दे डिप्टी कमीशनर बसीर-उल-हक चौधरी होरें एसएसपी अनुज कुमार हुंदे कन्नै बनिहाल दा दौरा कीता। एह दौरा ओंदे लोकसभा चुनाएं दी तैआरिएं दा जायजा लैने आस्तै कीता गेआ। उनें घट्टोघट्ट बुनियादी सहूलतें दी दस्तेयाबी दी समीक्षा कीती ते गौरमेंट हायर सकेँडरी स्कूल बनिहाल च बनाए गेदे स्ट्रॉंग रूम दा बी निरीक्षण कीता। डीसी होरें मतदान आले दिन एनएच-44 पर गड्डिएं दी बिना रूकावट दे आओजाई आस्तै जरूरी निर्देश बी दित्ते।

<><><><><><>

Rajouri Police

जिला राजौरी पुलस नै इक नकली वीडियो माड़ी मंशा कन्ने वायरल करने दे सरबंघै च इक मामला दर्ज कीता ऐ। पुलस नै आक्खेआ ऐ जे सोशल मीडिया पर इक वीडियो फैलाई जा'रदी ऐ जेहदे च किश ऐतराज जोग नारे शामिल न। जांच च पता लग्गा ऐ जे एह वीडियो बदली गई ऐ ते एहदे च ऐतराज जोग नारें दी आवाज, माड़ी मंशा कन्नै शांति दा माहौल खराब करने आस्तै भरी गई ऐ। पुलस नै एह पिच्छे जिम्मेदार लोकें दी तुपाई आस्तै पड़ताल शुरू करी दित्ती ऐ ते लोकें गी मशवरा दित्ता ऐ जे ओह ऐसी अफवाहें ते झूठी वीडियो पर ध्यान नेइ देन ते नां गै इस वीडियो गी सोशल मीडिया पर शेयर करन। ऐसा करने आलें पर सख्त कारवाई कीती जाग।

<><><><><><>

UK-Pakistan

बरतानिया दे विदेशी राष्ट्रमंडल ते विकास सरबन्धी दफतरै हाल च गै पाकिस्तान गी ओकड़े मुखें दी सूचि च शामिल कीता गेआ ऐ, जेहड़े बरतानिया दे बसनीकें लेई बड़े मते खतरनाक न। जियो न्यूज पाकिस्तान दा हवाला दिंदे होई खबर अजेंसी एएनआई नै आखेआ ऐ जे अपनी हालिया रिपोर्ट च बरतानिया दे एफसीडी दफतरै पाकिस्तान सनें 8 होर मुखें गी ओकड़ी सूचि च शामिल कीता ऐ जेहड़े बरतानिया दे बसनीकें लेई बड़े मते खतरनाक न।

<><><><><><>

Baisakhi

उत्तर भारत दा प्रमुख ध्यार बैसाखी अज्ज पूरे जम्मू च पूरे जोश, जज्बे ते खुशी कन्नै मनाया जा'रदा ऐ। एह ध्यार कनक दी बाङ्डी कन्नै जुड़े दा ऐ। एहदे कन्नै गै बाङ्डी दा कम्म शुरू होंदा ऐ। भारती पंचाग दे मताबक बैसाखी गी नमें ब'रें दी शुरूआत बी मन्नेआ जंदा ऐ। इस ध्यार गी बक्ख-बक्ख नाएं कन्नै मनाया जंदा ऐ जियां पच्छिम बंगाल च पोहेला बोइशाख, असम च बोहाग बिहु, तमिलनाडू च पुथन्दु, उत्तराखंड च बिहु, आंध्रप्रदेश ते कर्नाटक च उगाड़ी, केरल च पूरम विषु ते ओडिशा च महा विष्णु संक्रांती। 1699 च इस्सै दिन सिक्ख पंथ दे 10में गुरु, गुरु गोविंद सिंह होरें खालसा पंथ दी स्थापना कीती ही।

<><><><><><>

President,VP,PM Massage

राष्ट्रपति द्रौपदी मुर्मू होरें देश वासिएं गी बैसाखी, विषु, विशुप, बहाग बिहु, पोडला बोईशाख, वाइशाखड़ी ते पुथांडु दी शुभकामनां दित्तियां न। एह ध्यार 13 ते 14 अप्रैल गी मनाए जंदे न। अपने सनेह च राष्ट्रपति होरें देश दे करसानें दी मेहनत आस्तै आभार जताया ऐ। उपराष्ट्रपति जगदीप धनखड़ होरें बी राष्ट्र दी इनें ध्यारें दी मुबारकबाद दित्ती ऐ। धनखड़ होरें देश दी विविधता च एकता दे जज्बे गी कायम रखदे होई भारत दी सभ्यता गी दर्शाने आस्तै कम्म करने दा आह्वान कीता ऐ। उनें आखेआ जे एह ध्यार देश दे बक्ख-बक्ख हिस्सें च बक्ख-बक्ख नाएं कन्नै मनाए जंदे न जेहड़ा गै सारे देश दी गुड़ी सांस्कृतिक विरासत दा प्रतीक ऐ। प्रधानमंत्री नरेन्द्र मोदी होरें बी देशवासिएं गी शुभकामनां दिंदे होई मेद कीती ऐ जे एह ध्यार सारे आस्तै खुशियां ते खुशहाली आन्ने।

<><><><><><>

LG-Baisakhi

उपराज्यपाल मनोज सिन्हा होरें लोकें गी बैसाखी दी मुबारकबाद दित्ती ऐ। अपने सनेह च उपराज्यपाल होरें आकखेअरा ऐ जे बैसाखी दा ध्याड़ा सारे करसानें दी मेहनत ते राष्ट्र निर्माण च उंदे योगदान गी मान देने दा मौका ऐ। बैसाखी दे दिन गै गुरु गोविंद सिंह साहिब होरें खालसा पंथ दी स्थापना कीती ह ीते सारेंगी निज़वार्थ सेवा, सच्चाई, बलिदान, बराबरी ते सारें कन्नै हिर्ख कन्नै रौहने दा रस्ता दस्सेआ हा। उनें आकखेआ जे इस बैसाखी दे मौके उनें मेद प्रगट कीती ऐ जे एह ध्यार सारें आस्तै शांति, खुशहाली ते खुशियां आन्नै।

<><><><><><>

MEA Advisory

विदेशी मामले मंत्रालय नै यात्रा सरबंधी सलाह जारी करदे होई भारतीयें गी ईरान जां इजराइल दी यात्रा पर नेई जाने आस्तै आकखेआ ऐ। एह सलाह इनें थाहरें दे मजूद हालातें गी दिक्खदे होई जारी कीती गई ऐ। जेहड़े भारती पैहले कोला ईरान जां इजराइल च रवा'रदे न, उनेंगी भारती राजदूत दफतर कन्ने राबता बनाई रखने आस्तै आकखेआ गेआ ऐ ते उनें अपने आप गी राजदूत दफतर च पंजीकृत करोआना बी लोडत्रचदा ऐ। उनेंगी सलाह दितती गई ऐ जे ओह अपनी सुरक्षा आस्तै खास एहतियात बरतन ते घट्ट कोला घट्ट घरें थमां बाहर निकलन।

<><><><><><>

Arms Kupwara

सुरक्षाबलें कल कुपवाड़ा जिले दे जंगलें च चलाए गेदे इक तपाशी अभियान दरान बड़ी मती मात्रा च थेआर-असलाह, गोला-बरूद ते होर दूआ जंगी समेयान बरामद कीता ऐ। सोशल मीडिया दी इक पोस्ट च बीएसएफ कश्मीर नै आकखेआ ऐ जे कुपवाड़ा दे गंगबुग जंगलें च आतंकवादिएं दी मजूदगी बारे थहोई दी इक सूह पर कारवाई करदे होई बीएसएफ, फौज ते पुलस पास्सेआ इक सांझा अभियान रम्भेआ गेआ जिस दरान थेआर असले ते गोला-बरूद दा एह जखीरा बरामद होआ।

<><><><><><>

NH-44 Updated

जम्मू श्रीनगर राष्ट्रीय जरनैली शिड़क एनएच-44 कल संजा थमां गडिडएं दी आओजाई आस्तै खुली गेआ ऐ। रामबन कोल खुनी नाला थाहर थमां मलबा हआए जाने मगरा शिड़क खोली दितती गई ही। अपनी सोशल मीडिया पोस्ट पर जम्मू कश्मीर ट्रैफिक पुलस नै दस्सेआ ऐ जे दौनें बक्खी गडिडएं दी आओजाई शुरू कीती

गेई ऐ। श्रीनगर जाने आली गड्डिडं गी 1 बजे तोड़ी नगरोटा ते जम्मू औने आली गड्डिडं गी 1 बजे तोड़ी नवयुग सुरंग पार करनी होग।

<><><><><><>

IPL

आईपीएल क्रिकेट च दिल्ली कैपिटल्स नै लखनऊ सुपर जायंटस गी 6 विकटें कन्नै कल लखनऊ च हराया। जित्तने आस्तै 168 रंज बनाने लेई दिल्ली कैपिटल्स नै 6 विकटां ते 11 गेंदे दी बचत कन्नै लक्ष्य हासल कीता। पैहले बल्लेबाजी दा फैसला करदे होई लखनऊ सुपर जायंटस नै 20 ओवरें च 7 विकटें दे नुक्सान पर 167 रंज बनाए। जेक फ्रेसर-एम.सी.गुर्क होरें 35 गेंदें च 55 रंज बनाए जदके कुलदीप यादव होरें दिल्ली कैपिटल्स आस्तै 3 विकटां हासल कीतियां। अज्ज मोहाली च संजा साढ़े 7 बजे पंजाब किंग्स दा मकाबला राजस्थान रॉयल्स कन्नै होग।

<><><><><><>